



Nunatta inuiattut timersornikkut unammersuarterfissaanik FIFA-p piumasagaataanut naapertuuttumik pilersitsinerup avataaniit aningaasaliisussarsiuunnissaanut periarfissanik aningaasalersueriaasissatut ilusissamillu misissuisussanik suleqatigiisitamik pilersitseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Suleqatigiissitaq aningaasalersuinissamik misissuinerup inerneranik UKA2020-imi Naalakkersuisut Inatsisartunut saqqummiutissagaat.

(Inatsisartunut ilaasortaq Anders Olsen, Siumut)

Demokraatit qangalili inuinaat timigissarnerat pikkorivissullu timersortarnerat nunatsinni pitsaanagerusunik atugaqarnissaat sorsuutiginiikuvaat. Timersorneq timigissarnerlu aqputigalugu innuttatta formiginnerulernissaat taamaalillutillu uummaarinnerulernissaat pingaaruteqarluinnarpoq, tamannalu kissaatiginerpaasatsinnut ilaavoq.

Timersorneq timigissarnerlu peqqinnanngitsumik inooriaaseqarnerup kinguneranik nappaatinut pinaveersaartitsisuupput, peqqinnanngitsumillu inooriaaseqarnerup kinguneranik nappaatit nakorsarneri peqqinnissaqarfitsinnut aningaarsartuutaasorjuunerat qularutissaanngilaq.

Tamanna tunngavingalugu timersornermut atortorissaarutinut aningaasaliinissamut tunngaviumik isumaqataavugut.

Inuiattut timersornikkut unammersuarterfissamik pilersitsinissamut eqqarsaatit immi pitsaasuupput. Kisiannili eqqarsarluqaartaariaqarpugut, taamaalilluni inuiattut timersornikkut unammersuarterfissaq arsarnermuinnaangitsoq atorreqarsinnaalersillugu. Nunarsuarmi naliginnaajartuinnarpoq arsarluni unammersuarterfiit timersoriaatsinut allanut aammalu kulturikkut pisunut assigiinngitsunut soorlu nipilersorlutik tusarnaartitsisunut aamma atorreqarsinnaasarmata. Tamassuma aamma inuiattut timersornikkut unammersuarterfissap ilusilersornerani ilaatinnessaa pingaaruteqarpoq.

Timersortarfissualiornissaq aningaasartuutaasorjuussaaq, taamammallu atortorissaarutit innunut amerlanerpaanut iluaqutaasinnaanissaat pingaaruteqarpoq.

Siorarsiorfiup saqqummiunneqarnerani pilersaarutini saqqummiunneqartuni Nuummi timersortarfissualiornissaq ilaangaluarpoq. Taamanili tassungarpiq pilersaarutaasut tusarsaajunnaarsimapput, taamaakkaluartorli Kommuneqarfik Sermersuup, immaqa Siorarsiorfimmut pilersaarusanut ilaatinneratigut, sulii aningaasaliisooqataanissaat naatsorsuutigineqarsinnaagunarpoq.

Inatsisartunut ilaasortaq Anders Olsen matumuuna siunnersuuteqarnermigut Nunatta inuiattut timersornikkut unammersuarterfissaanik pilersitsinisoqarnissaanut avataaniit



aningaasaliisussarsiuunnissaanut periarfissanik misissuisussanik suleqatigiisitamik pilersitsisoqarnissaa siunnersuutigeqqissaarpaa. Tamannalu 1 million koruuninik akeqassasoq nalilerpaa.

Demokraatit toqqaannaq misissuisussanik suleqatigiisitamik pilersitsisoqarnissaa taperserusunngilaat. Inatsisartut ataatsimiititaliami sulinermini pilersaarutit sumut killinnersut paasiniallugu Kommuneqarfik Sermersuumut, Siorarsiorfimmullu attaveqarnissaat, qanorlu Inatsisartunit ikiuussinnaanersugut paasiniarnissaa pilerinartinneruaput.

Torrallataassanngilarmi taamaattumik suleqatigiisitamik pilersitsisoqassappat, suliniutinik aallartitsiniaasoqareerpat.

Demokraatit isumaqanngillat ataatsimiititaliami tuaviortumik sulisoqassasoq, taamaammallu siunnersuutip aappassaaneerneqarnissaa UPA 2020-imut kinguartinneqarnissaa siunnersuutigerusupparput.

Taamatut paasisaarluta siunnersuut Kultureqarnermut, Ilinniartitaanermut, Ilisimatusarnermut, Ilageeqarnermullu Ataatsimiititaliamut innersuupparput.